

愚菴小集

四

愚菴小集卷之十三目錄

雜著一

讀周本紀

讀貨殖傳

讀漢書

讀後漢書

讀唐書孝友傳

讀舊唐書

讀五代史

讀吳越世家

讀宋史曹彬傳

讀文選諸賦

讀文中子

書太平御覽後

書北盟會編後

書王右丞集後

書笠澤叢書後

書渭南集後

書朱子大全集後

書元裕之

書陽明先生傳習錄後

書夏瑗公幸存錄後

愚菴小集卷之十三

松陵 朱鶴齡 著

雜著一

讀周本紀

太史公記三代事多疎謬本紀尤甚其有可考者當據
尚書左傳國語正之又不妨取汲冢紀年帝王世紀及
秦漢以上之書參伍其說如幽亾平立本紀不載歲月
諸侯年表驪山之禍在庚午平王東遷洛邑在辛未世
家却盡連書于一年以愚考之西周亾後不卽東遷本

紀云犬戎殺幽王驪山下虜褒姒盡取周賂而去諸侯
乃卽申侯共立故太子宜臼是爲平王據此則平王先
逃在申諸侯求而立之立後乃遷洛也又左傳云幽王
用愆厥位攜王紂命諸侯替之而建王嗣用遷郊廓攜
王不言何人曰紂命必不當立而立者杜預以爲幽王
少子伯服非也幽王在位十一年三年嬖褒姒伯服之
生不過數齡且幽王以褒姒亡國褒姒旣爲犬戎虜去
必無復立其子之理考竹書紀年幽王見弑申侯魯侯
許男鄭子立太子宜臼于申虢公翰立王子余臣于攜

檣地未詳所在

是謂檣王竹書之言雖非可深信而檣王則不

妄當是幽王旣隕檣王僭位諸侯乃共舉兵黜之而迎
立太子宜臼其遷洛未定何時大抵自犬戎發難至平
王東遷必非止一二年事正月詩云赫赫宗周褒姒滅
之又云哀我人斯于何從祿瞻烏爰止于誰之屋乃西
周旣亾王位未定時作也竹書又云檣王爲晉文侯所
殺觀文侯之命有用會紹乃辟多修扞于艱等語以此
驗之正合其時衛武公鄭武公秦襄公同獎王室而平
王于文侯獨加殊禮有秬鬯弓矢之賜殆以殺檣王之

故歟太史公紀幽平間事甚畧故爲考之如此

讀貨殖傳

太史公貨殖傳將天時地理人事物情歷歷如指諸掌其文章瑰瑋奇變不必言以之殿全書之末必有深指或謂子長身陷極刑家貧不能自贖故感憤而作此何其淺視子長也趙子常汾云貨殖傳當與平準書參觀平準譏橫斂之臣貨殖譏牟利之主此論得之而有未盡愚以爲此篇大指盡于善者因之其次利道之又次整齊之最下者與之爭夫天子之富藏于山海高祖初

興開關梁弛山澤之禁是以富商大賈周流天下交易之物莫不通得其所欲此非所謂因之與利道之者乎迨至武帝征伐四夷大興神仙土木之事國用耗竭其勢不得不出于爭與貧民爭而千里負擔饋糧率十餘鍾致一石益漕餘粟關中太倉甘泉皆滿矣與富民爭而鬻爵輸粟入羊爲郎之令下矣與諸王列侯爭而朝賀皮幣薦璧以酎金失侯者百餘人矣與商賈爭而鑄鐵煮鹽算輶告緡之法縱橫四出矣至于京師置平準受天下委輸太農諸官盡籠天下貨物貴卽買之賤卽

賣之則天子自爲商賈子長心傷之而不忍盡言故首
舉計然之貴極徵賤賤極徵貴白圭之人棄我取人取
我與以潏致其意若曰平準之法權衡物價輕重間者
乃陶朱白圭猗頓諸人治生家之所爲也奈何以萬乘
之尊而出此乎中言五方都會百貨所出商賈輻湊苟
得其道以御之何至患貧且求富者人之同情也自廊
廟巖穴從軍任俠以至趙女鄭姬游閒公子諸技術之
人皆爲財利天子之職當重本抑末使貧富不相耀以
和其心而乃籠貨利以導之爭則雜業何所不至乎末

又歷數程卓宛孔曹邴刁間之徒以及姦事辱處者皆
得比于素封以見天子與商賈爭利則人皆化爲商賈
所以歎漢業之衰而高祖之開關梁弛山澤爲不可
復見也特子長以滑稽行文故子貢與陶朱白圭例稱
而于程卓輩則云當世賢人所以富若曰今世所稱賢
人特此曹子耳時桑弘羊以賈人子進天子方尊顯之
譏切之意見于言外班孟堅不達乃非之曰傳貨殖則
崇勢利而羞賤貧嗚呼以子長之材貫穿經傳上下數
千載而乃津津艷慕市兒賈豎著之于書何以爲子長

哉

讀漢書

古者史官世守其傳爲崑家之業至東漢猶然故漢書
叙傳首述班氏世系次述叔皮及巳之文章以見源流
相續其體同于史記但史記曰作某紀作某傳而漢書
曰述言不敢自居于作云爾其高五王文三王景十三
王武五子宣元六王皆次其時代序列傳之中王楙謂
諸王合叙一處如陳書唐書之類不應混入各傳梁蕭
瑒傳云得古本漢書叙傳自列項籍傳前不知班書規

模多依倣史記其混入各傳者正沿遷史楚元王諸世家體爾又云古本外戚傳在帝紀下不知叙四夷而後及外戚者斥之也漢燿于外戚故斥之次及元后著漢之所以亾也終于王莽而漢室之興亾具焉若以外戚次本紀後則全失作史微旨至于述韓彭英盧吳傳今本云信惟餓隸布實黥徒越亦狗盜芮尹江湖雲起龍驤化爲侯王而古本云淮陰毅毅伏劒周章邦之傑兮實惟彭英化爲侯王雲起龍騰此是傳本各有異同非必古本是而今本非也琰傳云有北僧南度惟齋一萌

蘆中有漢書叙傳三輔耆老相傳爲漢書真本其書非篆非隸紙墨亦古璞得之甚秘以餉鄱陽王此恐出好事者之言未足爲據

讀後漢書

范曄後漢書帝后紀十二卷列傳八十卷本刪取劉珍等東觀漢記及謝承薛瑩司馬彪劉義慶華嶠謝沉袁山松七家後漢史而成志三十卷則司馬彪所譔梁郢令劉昭注因范書闕志後人乃借以補之曄高自矜詡謂過于班固至論後有贊尤自命傑作無一字虛設通

考陳氏直譏爲贅洪容齋云人苦不自知班固豈可過
哉余謂范書非止不及固其于史家之法蓋有未備也
考馬遷史記帝紀之後卽有十表八書表以紀治亂興
亡之大略書以紀制度沿革之大端班固改書爲志而
年表視遷史加詳焉蓋表所由立昉于周之譜牒與紀
傳相爲出入凡列侯將相三公九卿其功名表著者旣
系之以傳此外大臣無積勞亦無顯過傳之不可勝書
也而姓名爵里存沒盛衰之跡要不容以遽泯則于表
乎載之又功罪事實列傳中有未及悉備者亦于表乎

載之年經月緯一覽瞭如作史體裁莫大于是而范書
闕焉使後之學者無以考鏡二百年用人行政之節目
良可歎也其失始于陳壽三國志而後來作者又援范
書爲例年表皆在所略不知作史無表則立傳不得不
多傳愈多文愈繁而事蹟或反遺漏而不舉歐陽公知
之故其撰唐書也有宰相表有方鎮表有宗室世系表
宰相世系表始復班馬之舊章云

讀唐書孝友傳

孝友傳始重於唐史兩漢以下無之漢重力田孝弟科